

### 0.0.1 tatiya sammattaniyāmasuttaṃ

#### 0. sāvattthinidānaṃ

1. pañcahi bhikkhave, dhammehi samannāgato suṇantopi saddhammaṃ abhabbo niyāmaṃ okkamituṃ kusalesu dhammesu sammattaṃ. katamehi pañcahi:
2. makkhī dhammaṃ suṇāti makkhapariyuṭṭhito. upārambhacitto dhammaṃ suṇāti randhagavesī. dhammadesake āhatacitto hoti khilajāto. duppañño hoti jaḷo aḷamugo. anaññāte aññātamānī hoti.
3. imehi kho bhikkhave pañcahi dhammehi samannāgato suṇantopi saddhammaṃ abhabbo niyāmaṃ okkamituṃ kusalesu dhammesu sammattaṃ.
4. pañcahi bhikkhave, dhammehi samannāgato suṇanto saddhammaṃ bhabbo niyāmaṃ okkamituṃ kusalesu dhammesu sammattaṃ. katamehi pañcahi:
5. amakkhī dhammaṃ suṇāti na makkhapariyuṭṭhito. anupārambhacitto dhammaṃ suṇāti na randhagavesī. dhammadesake anāhatacitto hoti akhilajāto. paññavā hoti ajaḷo aneḷamūgo. na anaññāte aññātamānī hoti.
6. imehi kho bhikkhave, pañcahi dhammehi samannāgato suṇanto saddhammaṃ bhabbo niyāmaṃ okkamituṃ kusalesu dhammesu sammattanti.